

東文選

三十七

内閣文庫			
番號	漢	17777	
冊數	130	(37)	
函號	墨	116	1





東文選卷之三十七

表箋

謝禮部郎中起居注知制誥表 李奎報

命出宸居優畀與縻之爵恩霑江郡召還謫宦之

臣僂僂拜榮周章失措中謝伏念臣性資推朴器

局庸虛文章不能以潤色綸言謨議不足以彌縫

衮職端遇文明之代方參侍從之聯衆爍橫生孤

根易拔果陷風波之謗出司嵐瘴之鄉政拙心勞

食貧口衆雖官閑而事簡奈地瘠而民殘皮腊僅

存鬢毛渾白朝天路阻難跳一箇之身戀闕情深

空灑千行之淚豈圖宸眷許復朝聯崇繁秩於禮
曹擢華資於諫掖申甄制職增耀士林清與要俱
本是待賢之地恩兼幸際反加無用之軀徒極銘
藏莫知報稱此蓋伏遇聖上陛下滌瑕蕩垢棄短
取長謂言涓滴之微儻補江湖之廣肆宣寵渥過
賁頑蒙臣謹當夷險不渝益礪懷霜之節始終自
誓永堅匪石之心臣無任

宗室沔謝除守司徒廣陵侯表

明綸不反固殊削葉之封淺器易盈懼過飲河之
腹省循非稱愧汗交并中謝伏念臣天質昏人

材樗散徒託乾坤之造粗免踣顛坐糜祿廩之豐
略微報効偶緣天幸復被聖知自從蘭坡之遊陪
嘗紆縟眷何意楓宸之邃密又記乘屨特崇甸服
之班俾陟信圭之秩本非公望又踐台躔八政修
而七政齊何德可致一命僂而再命偃以榮為憂
方拜章以乞辭復降詔而敦勉此蓋伏遇聖上陛
下仁親九族智燭群心用人若文王之時於周為
盛裂土如高帝之約非劉不封肆收譎薄之資庸
賁寵光之美臣敢不礪修鈍器鞭策駑才心戰淵
冰益勉諸侯之孝身為屏翰力匡天子之家臣無

任

謝除寶文閣待制表

職清書閣世號仙官寵渥驟加青雲生地光榮藉甚白日昇天中謝伏念臣頑鄙寡能孤寒無援材不中棖椽之用學未窺閫奧之深幸際明時獲從臚仕八年翰苑曾撫翼於鶴天七載諫垣濫棲身於鷄樹顧之詞臣之望屢更儒者之榮虛荷恩榮訖微補益豈意至明之鑒復言特異之褒鞶帶映腰而儕輩改觀黃裾引道而里閭聳觀才躡亞卿之秩已侔八座之儀自怪何才得參茲選此蓋伏

遇聖上陛下為政若張琴之緩急用人如制木之方圓故收譎薄之資兼畀殊尤之獎臣敢不激昂素志勉礪鈍鋒老不廢其學焉庶或裨於文德臣所有者忠耳以此報於聖恩

王妃受冊後謝太后表

妾某氏言伏蒙睿慈差降金紫光祿大夫門下侍郎平章事實文閣大學士判戶部事太子太保李某金紫光祿大夫守司徒中書侍郎平章事判刑部事太子小保盧某押賜竹冊教書別錄名一道冊妾為王妃咸平宮主者椒宮正位宜求窈窕之

賢琮璽具儀誤及賤微之品省循非稱愧汗交深
中謝伏念妾幸邁聖辰濫陪宸極素乏河雎之德
未符筐燕之祥虛荷恩憐訖微報効敢圖睿眷不
捐箕箒之勞驟霈洪私俾受禕褕之寵爲榮莫大
何德以堪此蓋伏遇王太后殿下功茂塗山賢躋
大妣早修婦道備嘗內職之勤雖至母臨尚記中
宮之選肆宣異渥庸賁孱資妾敢不念至憂勤躬
自菲薄恪承慈範申敬孝於坤闈動節禮容免箴
規於女史

公主謝御殿表

賜書押至溫然曲諭之辭禮冊驟加厚矣不贊之
惠無由遜避徒極銘藏中謝伏念妾質謝柔嘉儀
非婉孌因心資孝但知君父之嚴受性無良罔服
保阿之訓况甫免於髻鬢猶未勝於衣裳豈意宸
衷尚加褒典既峻宮闈之號仍疏脂澤之田此蓋
伏遇聖上陛下德務展親義敦立愛念椒房之弱
息勢可哀矜崇銅縷之盛儀恩宣優渥妾謹當勉
循內職益激愚悰草木之微雖絕謝生之路岡陵
之祝誓輸歸美之誠

公主謝御殿宣花酒表

妾某云云使星忽降恩雨隨露顧光華之實多在庸陋而奚稱中謝伏念妾植根瓊苑飲粹瑤津自省孱微之周室王姬之美遠蒙眷愛叨漢家公主之稱方顯冊之來宣有嘉賓而式宴豈謂聖上陛下雲霄降命花酒侑歡真四照之仙葩實九霞之濃液爲榮莫大增萬目之聳觀祝壽無疆指一心而自誓

公主謝下嫁表

妾言伏蒙聖慈以今月日許令妾嬪于河源伯至三日差降朝散大夫金吾衛大將軍高宗楫賜教

書一道仍頒禮物者三命丁寧特舉投綬之典十行密勿復優出綽之辭慶賜便蕃使華旁午撫襟靈而增悻靦面目以何施中謝伏念妾質謝猗蘭姿虧穠李託仙源之濬早費生成依聖日之昇例蒙恩賞腰懸銅縷口食膏田望已過於分涯固難論報身不離於左右誓篤承顏豈意宸慈曲循古制遠納委禽之聘遂成占鳳之祥此蓋伏遇聖上陛下政尚齊家化先理內念人倫之端始莫重婚姻賁息女之賤微俾諧伉儷妾敢不心虔帷薄步節佩環率禮無違事舅姑而思順因嚴致敬奉君

父以竭誠

公主謝王后表

后掖推慈親莅施繁之禮侯蕃作配克成合養之
歡俯仰增慙周章失措中謝伏念妾精非婺耀派
接天潢早違母育之恩繼奉坤貞之德養均已息
雖深撫育之情性弊下愚罔服柔嘉之訓夫何睿
眷及此薄軀導宣帝命之優遂正人倫之始此蓋
伏遇王后殿下慶膺沙麓功邁塗山光配至尊既
協符於鸞石尚容末質亦得耦於鳳臺妾敢不勉
眼女箴修成婦道委身外邸縱忘執櫛之勞注想

中宮第祝倒松之壽

公主謝王后殿箋

李奎報

妾云云鳳縵溫詞特降殊尤之命鸞閨微息遽叨
褒顯之名靜省僭踰伏深戰懼中謝伏念妾資虧
朗實齒尚駭癡託質王宮素欠慶雲之瑞叨名帝
女愧無望月之稱豈意誤恩驟加懿冊此蓋伏遇
王后殿下精分軒曜德應關睢配左燾之尊既膺
大號崇右駢之寵又及么軀妾敢不節以佩環專
於釧組鑿觀女則動無越禮之譏奉戴坤元不負
資生之德

謝物狀

湯沐疏封既加禮冊篚筐實幣繼錫珍頒前件物
等內府奇賾殊方名產物維多矣累鈞石以難量
受言藏之固緘滕而永秘

今公謝東宮箋

命出九重爵崇五等循涯有溢覲面何施中謝伏
念某學謝成麟智昏秤象偶緣天幸濫叨肺腑之
親猶有童心罔意服膺之禮夫何豐眷特出當鈞
導宣汪濊之恩俾受厖鴻之冊此蓋伏遇王太子
殿下溫姿玉裕茂德川冲羽翼已成雖同鴻鵠之

絕海首尾相應尚念鶴鵠之在原至使連枝與象
優澤某謹當能順而悌終和且平承覆萼之華不
唯鞞鞞託庇根之葛其未絲絲

王氏謝太后殿表

女爵疏封宜待柔嘉之德慈闈推澤遽加微薄之
軀遜避靡由感兢交極中謝伏念妾生庸質本

無淑姿年甫及於首笄雖歸侯邸儀未閑於步玉
動缺婦容但司巾櫛之勞粗守閨房之法豈圖睿
眷曲記孱資特宣溫厚之辭寔講褒嘉之典懿名
顯號粲然刻璽之章美宅良田副以實筐之幣榮

卷之三十七

五

生望表喜溢情涯此蓋伏遇王太后殿下仁合母
臨德侔坤載曲費撫憐之惠如已之生俾膺甄獎
之恩從夫而貴妾敢不致修履行勉服歲規益輸
孝敬之心小荅生成之化

任氏行同前表

有命自天過賁褒封之禮措躬無地實深慙赧之
懷中謝伏念妾素乏蕙心又無瓊質藉世家之餘
慶幸適侯藩遵閨壺之成規虔供婦職恩覃九族
寵集一門茲已過於初心本未期於顯賞夫何異
數又暨微軀驚金印之騰暉眩泥函之煥彩此蓋

伏遇王太后殿下塗山翼夏大妙興周特崇定策
之臣優加體貌燕及執巾之妾俾玷榮光妾敢不
常鑒女箴恪承慈範寸心自誓敢孤造化之私頃
步不違永祝壽昌之慶

忠憲王謝聖朝遣仲臣討平遼賊表

小邦無罪久罹強寇之侵凌大聖應期特出神兵
而汎掃恩靈所暨疲瘵同蘇中謝伏念臣世承箕
子之封舊接契丹之壤曾未有與我釋憾之故迺
今舉如此無名之兵闌入封疆大殘人物顧蜂毒
之滋甚出虎旅以莫除豈謂義篤恤隣仁深宇小

初降鷹揚之衆就平蟻聚之徒偽王自斃於城中
殘孽悉降於鉞下函生再活舉國歡呼臣敢不祝
天壽之無疆少酬萬一迷臣職而嚮內罔有二三

謝宣諭表

星使鼎來天書狎至僂僕拜命欣悚交懷中謝恭
惟挺上聖之資受昊天之恩握樞臨極居萬乘之
獨尊耀武揚威微一方之不服詔頒明詔布及遐
方臣夙戴皇靈恪供臣職更沐自天之訓倍深就
日之誠

知奏事金若先謝東宮嘉禮表 金良鏡

初聞鴈騁謂斯言之誤傳及覩鸞書疑是夢而非
實迨荷丁寧之語輒增惶恐之懷竊以娶妻須忌
於同家擇地必資於異姓是謂禮也何莫由斯故
在漢家則馬氏鄧氏亦配於君在本朝則金氏任
氏亦為之后不圖聖代枉辱臣家伏念臣鯁淺無
能驚頑不學但賴姻親形勢之異早參皇朝華顯
之聯風虎山西驟陟爪牙之秩雲龍日下又叨喉
舌之權勅教童駮之孱兒升配元良之盛德野樹
接月中之桂理連一枝行瀆通天上之河波潤九
里雖或愧士民之望切自祈門戶之與此蓋云云

義重承祧心專啓嫡念微臣是鷄林宗室之後裔
而賤息爲鼇戴功臣之外孫故欲崇功德於一時
于以結恩榮於萬世里閭佳氣邈連碧縷之門親
戚寵光專荷黃金之屋臣敢不青宮千載克輸羽
翼之功紫極萬年益盡股肱之力

東宮謝立府表

恩疏璿極位正銅闈偃僂拜嘉凌兢失次竊以命
名所以制其義開府所以備其儀是爲儲貳之光
實出聖明之眷云云君臨秉哲子愛推慈謂言叢
爾之軀堪守承哉之命時雖方在於幼海勢欲益

固於宗城窮文數而披尋擇題厥號罄士林而沙
汰選置乃寮旣左右惟其賢而見聞莫非正臣敢
不學敦時習德懋日新舉千里而飛何必待商山
之四皓祝萬歲之壽竊自期崇岳之三呼

謝物狀

帝詔絲綸降自北宸之所皇恩雨露洽然東禁之
春前伴物等名品尤奇裁成極巧受賜多矣誠可
謂爲龍爲光感恩有之所報者惟忠惟孝

謝刑部尚書表

朴暄

委重秋卿位超星座讓曰無虛於授受猶未見容

寧將有責於曠穰遽難違勅云云伏念臣謬賚翰
墨之微才端遇風雲之盛會平生步驟未居猥冗
之一官不分頭銜恒帶清華之三字是猶大過尚
有餘慙又何宣宸極之絲綸許吏擁尚書之劔履
此蓋伏遇云云謂臣修不腆交隣之簡牘知臣有
無華報國之誠忠殆欲償其此勞故今及於茲賞
然猶鞠讞重權之非據豈例文章小藝之妄裁諒
或如斯豈堪獲已片言可折雖未及於前賢衆狀
精詳庶有效於今日

謝同知貢舉表

李百順

命出被楓任叨分桂榮生意表恍若夢中伏念少
也收科壯而莖仕幸遇右文之代久塵演誥之司
昨啓士闡未得擢犀之角今參貢院豈能窺豹之
斑雖知不稱之譏難追已行之令強顏拜寵逆淚
霑巾此蓋云云覆物如天使人以器先多士以降
恩俾連年而典選臣敢不眼前騏驥庶不混於玄
黃手裏棟梁亦欲分於長短

謝賜羊表

金址

諄諄以言惠而好我泯泯其角賁然來思拜賜已
還銜恩莫任伏念臣邈居遐裔專戴天庥幸賴寬

仁粗保餘黎之有蠢常輸謹恪但祈萬壽之無疆
比當賤介之迴爰有珍牲之錫維群之數乃半乎
千寵典出於無前感情臻於罔極此蓋伏遇得牧
人之術敦愛禮之心至或念於餽牽而許充於養
養臣敢不仰慈爲母庶同跪乳之恭循度奉君如
入麾肱之擾

謝恩起居表

曾覩龍顏倍切尋常之懇每承鳳詔如親咫尺之
威遐祝之勤大明是照

謝表

孱息率至使華偕來恭承稠沓之睿恩伏積於慶
於愚抱伏念逃居東徼專戴上朝曾修蟹執之儀
諒迷因極適值龍飛之際優荷撫矜三韓舉受於
生成萬祀唯期於報效昨今世子徃覲宸庭方其
嚴陞之親趨示以至慈而深慰凡所敷奏實皆允
俞因下詔云境上屯戍悉令卷還而又斷自己未
年二月已後被虜且逃者並令歸國至於陸地出
排事姑從所便自度以爲其多般撫字如此照情
赫赫之聖明幸燭知於千里到骨深深之情懇當
淪及於百孫况賜臣以殊常玉帶一腰又賜子以

滿地金縷衣弓箭寶鞍等事兼及一行上下各賜
金縷衣有差益知眷遇之尤豐實極銘藏而仰謝
真至仁之加恤俾末世以奉供

謝恩起居表

中國觀光如記鈞天之一夢外藩貢祝但罄嵩嶽
之三呼况屬春旗想增慶履

謝表

往宗魏闕無前恩寵之過情還暨群黎罔極感藏
之淪髓襟袖將腐涕洟未乾伏念臣以荷聖慈虔
供侯服曾謂九霄之路邈矣難攀昨乘八月之槎

忽然易到非至仁之專恃則安敢如歸於父母雖
小國而親朝則尚能助顯於聖明繫一時之幸逢
實萬國之同羨何圖睿眷屢出常鈞道途館待之
既豐朝夕籩牽之尤腆中都陌上許容鸞噦之朝
萬壽山頭再賜鹿鳴之讌及其返也賜臣以衣帶
鞍馬駱駝等事并牧羊人暨行李內陪臣衛卒皆
賜服襲有差又輟邇臣而為伴俾臨歸路以護行
凡所經由爛其委藉仰賴不貲之惠果能無恙而
還豈惟受賜之一行感戴禱祝抑亦聊生之餘噍
顛倒權欣今遣臣弟廣平公王某以臣歸國事由

往奏宸所伏望云云俯收報謝之微誠益置矜憐
之美化永副一心之望遐延億載之休

謝釐降公主表

王姬方降國俗盡歡凡在瞻觀孰非抃躍伏念臣
深緣宿劫生幸昌期四年入侍於宸庭萬邦爭羨
之恩遇一旦連婚於皇息千古罕聞之眷憐仍許
襲藩旋今就國尋降蕭雍之車服穩經遐遠之道
途惟此生靈悉均慶快三韓民物從今有恃於庇
依萬葉子孫洎後相傳於翊戴

同前謝酒表

寤寐淑女恩宣燕爾之婚宴邀嘉賓寵示懽然之
飾先生樽俎喜溢襟懷伏念臣學靡緝熙資無冲
裕職叨監國誠殫三問之日勤義重嗣親首許十
倫之天合方展初筵之秩秩驟頒羨祿之油油禮
云既成德以既醉優沐蓼蕭之澤但期嵩岳之呼

上東宮謝宴箋

龍樓賜筵樂與賢共鳳翰摘藻儼若天成何幸而
觀况疑是夢切以自古承桃而正本皆先嚮學以
熙光漢儲招園綺於南山並今講德魏嗣集應劉
於東閣相與賦詩博望之迎賓讌娛宣猷之致酒

吟獻畫堂宴喜之作則江搃應令禁苑餞別之章
則褚亮奉酬如茲歷世之流芳未可單辭而備記
本朝父堯子舜師呂保伊由睿宗已前嘗有唱和
集之傳於後及毅廟而下未聞歌詠事之在其閒
恭惟王太子殿下五稱聰明三至孝敬氣稟胎教
生知道德之純習與性成富有文章之煥至乃崇
賢尊老樂善好詩常謂朝家安有斯文之不右故
當寤寐庶幾吾道之更東爲憐請退之耆儒爰示
償勞之寵睠屬黃花之商律開蒼竹之震宮詞苑
擢英釋林抽秀特臨蘭殿星羅水陸之珍羞俄動

玉毫露洒雲霄之寶唾星斗森芒於掌上笙簫發
韻於耳邊何富貴之嬌姿還有清新之峭格比
如蠶粟初華之芍藥半拆紅房檀藥一樹之珊瑚
纔離碧海和者蓋寡傳之無窮殊榮皆比於錢踈
今望倍增於歌啓仰喜聖明之兩作克復古風何
圖文物之重興適當今日奚止三韓之慶賴實惟
萬代之休稱伏念臣猥忝陪僚獲叅盛集池蛙鼓
吹慙賡廣樂之音海鳥盃盤愧饗大牢之味但竭
心肝於榮抃期成羽翼於始終

平章事李藏用謝侍中表

鷄綽臚傳恩加分外蟬冠頂壓事若夢中揣能方
切於遜辭誓勅 云云伏念臣發從科
第憑以門資夤緣聖代之奇逢跨歷儒林之重委
紬史析經之地多所妨賢汰才創命之場亦會承
乏龍案常依於白日驚鞭上了於青雲然又叨於
鼎司略無補於袞職豈擬至仁之意尚記微勞優
加殊獎之私俾膺極寵臣雖愧此世所榮之此蓋
伏遇云云念臣始終鑽紙於陳編憐臣前後負霸
於絕域且謂臣外舅先臣某嘗有是拜

同知樞密院事尹克敏謝知樞密院使實文

閣大學士太子賓客表

進華箋於樞庭自燕鴛蹇兼極榮於書閣况添鵠
飛靡獲遜辭徒深欣愧伏念云云拙於有用老矣
無能嘗爲吏於方州訖未顯效及品人於詞賦莫
得精詳以居三字之聯叨納九重之命並無可錄
方有所慙况盛朝非素餐之時而密職豈卧理之
地夫何異獎復許優遷縱虞環曠之多誠感寵光
之劇此蓋謂臣有舊於潛邸知臣無他於戴天捨
其膂力之旣愆期以忠誠之儻售臣謹當扶持衰
病庶全一受之殘形偃勉始終小補重興之殷化

大司成柳璚謝左右衛上將軍表

勞輕報重如蚓餌之釣鼈寵侈榮踰類麟皮之裹
鹿牢辭未格曲諭彌敦伏念臣承世祿于朝自賢
科而仕嘗向權門而屈已俯仰多慚尚從王室以
貢誠進退有秩幸今掃燻天之積禍果爾成衛社
之微功斯乃倚於皇靈實非關於人力豈圖非分
過沐異恩不唯得典於絲綸至亦叨叅於劍履本
惟駑緩但期冗食於詞林敢意雄飛反取虛聲於
兵幄得此兩兼於文武顧非萬幸於平生祇荷訓
章唯知感泣此蓋云云功無棄小賞不嫌多謂臣

外曾祖先臣克謙嘗有是拜欲令臣世濟其美故
將殊特之私猥及妄庸之品臣敢不敦詩閱禮有
希郤穀之帥師列事論兵無愧畢誠之在禁

右副承宣元傅謝翰林學士表

內翰摛華元屬工文之巨手北門視草過褒淺學
之頑軀未獲遜辭徒增欣悚云云性惟鈍闇業不
精強自揆庸資豈合朝廷之器使端逢盛際偶緣
儒術以階升從始登科管記已來未嘗奉使分符
而出芸臺待制至叨三品之榮香案納言訖之一
毫之補識量不足以承當聖問文辭不足以潤色

皇猷方虞癘曠之實多敢望獎甄之斯緊螭陞忽
沾之厚渥復出心期鶴天高翥之殊榮恍如夢拜
撫膺自感洒涕難安此蓋謂臣方典於龍喉知臣
頗殫於鴛力茲示私人之寵眷欲增文士之歆觀
臣敢不八影花磚嘗戒李程之晚入一條蓮燭庶
追狐楚之夜歸

謝監試試負表

自天假手惟試席之主張爲國理容在才華之薦
擢屬當重委徒積危棕云云局促庸資羸踈末技
早登三級僅叨榜眼之名俄躡八磚粗効詞頭之

命未嘗暫出於外頗得徐驅而前久居制誥之聯
常典文章之任東施入西施之室強顰蛾眉南阮
遊北阮之門空曬犢鼻况此選闈之提柄實爲儒
苑之極榮人皆把冊已來日幾翹襟而望及茲聞
勅疑是夢而非真竊自揆能豈斯權之可副讓牢
莫頷感極難言此蓋云云既臻多士之寧猶恐一
賢之失謂臣儻宿於摘藻代匠俾專於度才臣則
與手試眸策心努力修業及時之英俊罔敢有違
得賢佐理於聖明庶幾無負

謝聖旨起居表

李齊賢

垂髫北上三年別荷於眷憐銘骨東歸一日何忘
於請祝

謝表

諄諄之命用示恩威眇眇之資徒增感愧云云在
衡若舜弛畧如湯克類克明叅兩儀而立極以寬
以簡一四海之歸心臣猥將總角之年親奉垂衣
之化顧遭家之不幸恐無地以自安特降鳳綸委
以藩宣之寄載馳龍節申其策勵之辭豈惟臣庶
之舉欣實是宗祧之攸賴茲蓋義敦柔遠仁務恤
孤念齊桓尊王之功欲存後裔使蔡仲繼父之業

以蓋前愆臣敢不當夙夜以欽遵庶生成之末賴

謝御衣酒起居表

父臨普率恩徧濱海之封嬰慕寬仁心切後天之
祝

謝表

皇華傳命示寵賚之非常弱質踰涯抱感情之罔
極欽惟奉先惟孝字小以仁記勤王於聖武之朝
惠鮮遠俗念尚主於世皇之日保佑孱孫特宣密
勿之言兼致殊尤之錫仙壺九醞濃舍雨露之香
宮錦一封爛吐雲霞之彩浹洽自天之澤權呼滿

國之榮臣敢不每思醺骨之恩庶盡糜軀之效

謝功臣號起居表

年聞九奏於鈞天猶尋一夢效三呼於嵩岳每祝萬

謝表

千載一時欣戴自天之命四方萬國聳聞稀代之榮銘骨何忘粉身難報欽惟云云以簡臨下惟精執中率祖攸行不怒而威不言而信順帝之則所過者化所存者神至如草木之生成皆是乾坤之休養伏念爰從弱歲獲覲清光充宿衛於龍樓既

乏絲毫之補襲蕃宣於鰈域亦微尺寸之功何圖十有二字之褒謬及百無一能之品茲蓋伏遇記累世勤王之效憐愚臣戀主之誠特垂綸綍之言用比鼎鍾之刻臣謹當志求仁而務惠於物身服義而願忠於君保遠民蠢蠢之情庶幾致於安靖嚴上國明明之訓敢不奉以周旋

詔赦謝恩起居表

歲北辰居所下臨析木之津東海守封上祝蟠桃之

謝表

乾坤洪造曲全庶物之生父母至仁旋棄癡兒之
過云云乃神乃聖以簡以寬理尚無爲體舞干於
大舜心敦不忍法弛畧於成湯故茲四海之康繁
我一人之慶伏念幸遭盛際叨襲弊封賊子亂常
殆將覆國愚臣應卒不及聞天今者伏蒙云云推
視遠之明廓包荒之度揆事機之非所得已矜情
實之無可奈何霽雷霆之威既往不咎濡雨露之
澤咸與惟新乾坤全物之生父母棄兒之過亦不
足爲喻也人非木石豈不知感哉臣謹當布德音
於臣庶以寧一方修職貢於歲時無替萬世

謝銀字圓牌起居表

表東海以爲封曾叨寵命拱北辰之居所庶效忠
誠

謝表上

聰聽必卑天豈鶴鳴之相阻睿恩偏重山非蚊負
之可勝惟一國之感銘實四方之欽慕伏念遭逢
盛旦宿衛多年言告言歸雖輟趨蹌之列而康而
色每容敷奏之辭適因賤介之還迴與先臣之賜
璽書六軸承使命以有憑銀字三符報軍情而無
滯茲蓋伏遇簡臨寬御厚往薄來推博愛於邊氓

視同內地記微勞於上世撫及後昆臣敢不率祖
攸行述侯所職文有闕天子之休夜寐夙興請祝聖
人之壽

李兀兒扎宴後謝起居表

父臨普率旁推一視之仁嬰慕聖明累貢三呼之
祝

謝表

乾坤邈矣敢期呼籲之聞草木微哉忽致恩榮之
沐感驚交至蹈舞不知云云體禹儉勤躋湯聖敬
遵祖宗之興禮雖舊惟新擁廟社之休祥於斯爲

盛兼屈聽卑之鑑克敦字小之仁眷言出日之邦
生我俛天之妹羨鍾坤順遵母儀於六宮慶毓
明固邦本於萬世於是降璿源之貴戚馳玉節之
重臣陳飲食以賜歡賁金繒而將意既醉以德爲
求好於舅甥不顯其光想歆觀於夷夏臣敢不念
其卵翼報以粉糜專述職於箕封每輸誠於華祝

求陵復位謝起居表

鄭誦

披雲紫殿親瞻穆穆之光就國青丘常抱拳拳之
意

謝表

屢致人言宜加重譴曲蒙天造還撫舊封感極涕
零媿深汗洽中謝伏念不學無術莅事惟煩頃承
先臣主器之言適值仇家射鉤之禍謂曹悻悻可
托喜八觀於明庭萋斐橫生忽見猜於巨室謂大
顏力右頓黨事將不利於王踏憂危之不測懼誣罔之難明豈
期聖主之原情登見愚臣之非罪特迺清問仍賜
寬恩驟頒綸綍之榮復襲箕裘之業茲蓋伏遇云
云乾行以律離麗而明體舜帝聖讒之仁遵世皇
立長之義憫臣被姦人之欺負無以自安俾臣洗
前日之瑕疵期于後效臣敢不敬修可願深創往

愆夙夜以思副君親之重託始終厥職至于孫而
無渝

謝復弓兵馬匹起居表

李穀

昨辭舜殿忽周一歲之星邈處箕封常祝萬年之
壽

謝表

詔令雷行萬方更化德音天降一國生光仰荷恩
私伏增感愧伏念臣昨因述職幸獲入朝適逢皇
極之敷庸復至元之洽於至元三年四月初三日
欽奉詔書內漢人南人高麗不得隱藏軍器執把

弓箭除官負存留馬匹外其餘盡行拘刷以小邦
邈居於東土而舊俗頗異於中原當太祖天造之
時實先歸附值世皇龍飛之際尤著勲勞有錫馬
三接之榮餘館甥貳室之慶約束雖遵於聖制典
章無墜於祖風苟一日而變更慮三韓之驚動又
近弗庭之俗恐窺無備之邦鑿井耕田斯民何知
帝力馳馬試劍絕域宜耀皇威是用籲號果蒙俞
允此蓋伏遇云云廓乾坤之量垂日月之明謂臣
世篤忠貞憐臣躬修朝覲皆仍舊貫曲借洪休臣
敢不謹守封疆恪勤職貢祗服釐東之命益輸報

上之誠

謝恩起居表

襲封三載功未著於保釐祝壽萬年心常馳於垂
拱

謝表

使星洊至恩露屢垂拜賜已還感銘奚極伏念年
齡方弱學業未成猥承聖主之洪私早襲祖先之
餘緒釐東之寄已屆於三年報上之心何忘於一
日効微勞之無地愧珍貺之自天光爛宮衣香浮
內醞此蓋伏遇云云齊莊中正濬哲文明邁舜德

東文選三十
二十一

東文選三十一
之好生體臯謨之柔遠諒臣世忠於上國憐臣係
出於外甥不責其愚而加其惠臣謹當沉酣渥澤
賡四方既醉之歌被服寵榮嚮萬物皆春之化
上大元皇帝謝賜復土田表 釋宓菴
澤下層霄春迴枯枿凌兢失措荷戴難任恭惟皇
帝陛下德冠百王功高萬世闡一視同仁之化丕
冒海隅得四方嚮內之心光宅天下謳歌沸於中
外蹈舞均於邇遐伏念臣性行迂踈襟靈淺鄙猥
以祖門之踵後濫為釋苑之指南茲寺也五世叢
林六和淵藪代弘禪髓恒今衆席以無虛素之土

毛常患食輸之不轉頃蒙先后之憫此載割公田
而錫焉自茲支命以聊生謂可安身而弘道及值
使華之初屆點出軍須迺尋官藉之舊傳例收田
稅衆多食寡事迫勢窮然外國邈隔於辰居恐下
情難聞於天聽豈意皇帝陛下廓包荒之量迴燭
遠之明知臣祝聖之積勞念臣弘法之微効優垂
新綍俾復舊田恩既出於尋常感何忘於頃刻臣
敢不倍輸誠而戴仰益勵衆以薰修誓將蒲柳之
殘年恭薦椿檉之遐筭

又

日月恒升容光必照乾坤覆燾無遠不包凡屬母
臨悉均嬰慕恭惟云云居域中之大爲天下所宗
德合好生則百姓咸蘇仁滂綏遠則九幽率服蕩
蕩也巍巍也盛業四於三王昭昭然炳炳然休光
隻於千古入大平之域家騰旣醉之歌伏念臣
法海微波禪林老幹邈居外國獲承一視之私其
在下情敢忽三呼之祝伏望廓包容之度迴旁燭
之明念臣奉福之勤諒臣嚮化之懇賜爲願剝宣
降德音則臣敢不倍蟻垤以裨山吐螢光而增日
益竭微誠於香火仰祈景祚於岡陵

東文選卷之三十七

東文書三十一
二七五



